

## FILEMÓN

### Pablo escribe a Filemón

**1** <sup>1</sup> No'on aj Pablojon, cá täscäbenet ni junda cá yajben lot Filemón, ane chich a täclenon t'ocob bajca cá tz'aycun t'ocob u t'an Dios. Ya' mäcälön preso uc'a cá tz'omben aj Jesucristo. Juli wida cá lotla aj Timoteo, y nänte' cá tz'ibän t'oc ni junda. <sup>2</sup> Ni junda cá täscäbenetba, mach juntü ta'a, tuba täcä cá lotla ix Apia, y aj Arquipo jini u chen jinichiba patan que cá chenba, y upete machcatac u woylan uba tan a wotot, jini que u tz'omben Diosba. <sup>3</sup> Co que ajnic utz u c'ajalin cá Papla Dios y Cajnojala aj Jesucristo t'oc anela, y u yäc'benet ajniquetla utz.

### El amor y la fe de Filemón

<sup>4</sup> Cá c'ajti'inet chich tan cá c'änti'ya, y cá paq'uin älden Dios que uc'adios u chi por ane. <sup>5</sup> Uc'a a'uton cubin cache' mäx a yajna'tan a lotob, jini machcatac tuba chich aj Jesucristoba, y cache' a c'alin tz'omben Cajnojala aj Jesucristo. <sup>6</sup> Cá c'atben Dios que upete machcatac u tz'omben aj Cristo ca' chich a tz'omben ane, y uc'a u chänenob cache' a c'alin chen tu toja, u c'alin cäne' más y más cache' tä' utztac ni u yäc'benonla aj Cristoba. <sup>7</sup> Mäx ch'a'a cäjin uc'a cubin cache' mäx a yajna'tan a lotob, y tä' utz ayäli täc pixan, uc'a ane chich, cá lot, a ch'a'alesben ujin upete machcatac u tz'omben Dios.

### Pablo pide un favor para el esclavo Onésimo

<sup>8</sup> No'onba, uc'a u yajc'änanon aj Cristo u ch'e' cá cocoj äc'benet a chen tu toja. <sup>9</sup> Pero mach uxon cá chen ca' jini. Mejor cá ch'oc chen cäba t'oc ane, uc'a mäx acä yajna'tanet, y a yajna'tanon täcä. No'on aj Pablojon, noxibon, y badaba ya' mäcälön preso uc'a cá tz'omben aj Jesucristo. <sup>10</sup> Ni cá c'atän a chenba, jinda une: Osen bajca anet aj Onésimo, uc'a bajca mäcälön preso cá tz'aycäbi u t'an Dios y u tz'oni chich, jin uc'a es ca' a wälä untu cajlo'.

<sup>11</sup> Ajniba mach u ni' oli u cherbenet a patan, pero badaba utz tuba u cherbenet cua' chichca que c'änä ac'a y tuba u cherbenon cua' chichca que c'änä cäc'a täcä. <sup>12</sup> Bada jiq'uin cá täscäbenet tä cha'num. Sapän chich como si fuera no'on ac'oton bajca anet. <sup>13</sup> Mejorica si cá colesan wida en lugar de ane tuba u täclenon bajca mäcälön preso uc'a cá tz'aycun u t'an Dios. <sup>14</sup> Pero mach coli cá chen ca' jini si ane mach a wäle'. Uc'a si ane a wo u täclenonba utz chich, pero mach coli cá cocoj äc'benet a chen. <sup>15</sup> Bay jin uc'a pasi chap'e uxp'e q'uin bajca anet, uc'a tu sujtäba, nonoj colac t'oc ane. <sup>16</sup> Pero mach co que a sapän ca' untu a

wajpatan. Co que a sapän ca' untu mero a yajben lot uc'a u tz'ombi Cajnojala. No'onba cä yajna'tan chich, pero más c'änä a yajna'tan ane, y mach uc'a a wajpatan sino que uc'a u tz'ombi Cajnojala aj Jesucristo.

<sup>17</sup> Si a totoj yajna'tanon ca' untu a yajben lotba, sapän chich como si fuera no'on. <sup>18</sup> Si u cherbet cua' chichca jini que mach utz, o si u cherbenet debe, äc'benon cä toje' no'on. <sup>19</sup> No'on aj Pablojon cä tz'ibbenet ni junda t'oc cä c'äb, bajca cälbenet que no'on chich cä xe cä tojbenet. Mach coli cälbenet cache' ixta ane täcä a cherbenon debe más, uc'a bada jöpä ayanet, uc'a jinq'uin cä tz'aycäbet u t'an Dios a sapi chich. <sup>20</sup> Co jiq'uin, cä yajben lot, a ch'a'alesan cäjín uc'a tubalonla chich Cajnojala. Si a chen jini favor a sapän aj Onésimoba u xe chich tä c'ac'a' ch'a'alan ujin cä pixan uc'a a tz'omben aj Cristo.

<sup>21</sup> Cä tz'ibbenet ni junda uc'a cuwi chich que a xe a chen ca' jini. Cuwi chich täcä que a xe chich a chen más de lo que mu' cälbenetba.

<sup>22</sup> Cälbenet täcä que a tuse' bajca cä xe tä ajtä ya' jini, uc'a no'on cä pijnan chajcacon uc'a ni c'änti'ya que a chenba, uc'a xicon cä chänenetla.

### **Saludos y bendición final**

<sup>23</sup> U täscäbenet u c'aba' Dios aj Epafra. Une täcä u tz'omben aj Jesucristo, jin uc'a mu' u lotinon bajca mäcälon preso. <sup>24</sup> Aj Marcos, aj Aristarco, aj Demas y aj Lucas u täscäbenetla u c'aba' Dios. Cajtäclayajob chich täcä t'oc ni patan ta Dios.

<sup>25</sup> Ajnic utz u c'ajalin Cajnojala aj Jesucristo t'oc apetela. Che' chich ajnic.